

普超三昧經卷第一

毀一

西晉三藏法師竺法護譯

正士品第一

聞如是一時佛遊王舍城靈鷲山與大比丘
衆俱比丘三萬二千菩薩八萬四千一切聖
達靡所不明毀一開士大士神通已暢已得總持
辯才無礙得無所著不起法忍曉了定行見
衆生心隨所應度而爲說法四天王天帝釋
梵忍天王及餘無數諸天龍神捷沓和阿須
倫加留羅真陀羅摩休勒人與非人各百千

衆而俱來會爾時濡首童真菩薩在山一面
異處梁上與二十五正士俱而講論法其名
曰龍首菩薩龍施菩薩首俱菩薩首藏菩薩
蓮首菩薩蓮首藏菩薩持人菩薩持地菩薩
寶掌菩薩寶印手菩薩師子意菩薩師子步
雷音菩薩虛空藏菩薩發意轉法輪菩薩辯
諸句菩薩辯積菩薩海意菩薩太山菩薩喜
見菩薩喜王菩薩察無岸菩薩遊無際法行
菩薩超魔見菩薩無憂施菩薩諸告議菩薩
是爲二十五正士兜率天上有四天子俱造

濡首童真於後侍焉其名普華天子光華天子美香天子常進法行天子復有異天子不可計數僉然來侍如斯正士諸天子等亦悉會坐各各講論如是之儔迭相謂曰仁者欲知佛之智慧弘普無限不可思議不可稱量無能滅度盡極際者不可以小意思原大德鎧當以何方便誓被戒德鎧而能逮茲大乘佛乘諸通慧乘不可思乘斯應道乎龍首菩薩曰積累功德不以厭足建立休祚不可限量而不毀失戒德之鎧一切所作無所希望

則應大乘諸通慧矣龍施菩薩曰普弘等心調和其志溫潤其性柔輒其意而心仁厚堅住正願於諸通慧被戒德鎧化度生死則應大乘諸通慧矣首俱菩薩曰不可計劫趣斯大乘被戒德鎧於無數劫不念劫數則應大乘諸通慧矣首藏菩薩曰其自建立獨安已者不能逮趣大乘通慧捨已之安建立衆生欲使大安隨其所便令無僥冀而無所起勸進群黎立於道法則應大乘諸通慧矣蓮首菩薩曰族姓子憶如來所講假使有人自不

柔順無有靜寂不隨律教而欲調伏靜寂於他律勸人者未之有也其自調順靜寂奉律乃能化勵剛強憤亂抑挫犯禁則應大乘諸通慧矣蓮首藏菩薩曰其同塵勞於世法者則不度世其不同塵勞於世染者乃能度世是故菩薩有利無利若譽若毀有名無名若苦若樂不動不搖則應大乘諸通慧矣持人菩薩曰不可從他而致大乘諸通慧也吾獨一已而無有侶以衆生故誓被德鎧設護一切則吾所應將濟救攝須臾精進而不解

怠教化黎庶無違發學斯則應大乘諸通慧矣持地菩薩曰譬如仁者地之所載一切衆果百穀藥木因地而生地無所置亦不求報群庶品類皆仰地活地不辭猷不以爲勞開士大士亦當如是發心如地心無所著不以喜怒勸諸黎庶使趣佛慧而不相報則應大乘諸通慧矣寶掌菩薩曰仁者當知被上德鎧乃至佛慧無能沮敗令失大乘若於夢中不志二乘聲聞緣覺常以實心諸通慧心爲人講宣於珍寶心無所貪惜無所愛恪勸衆

大乘誓被德鎧彼所學乘非無有乘不增不減其心如是無所欽慕則應大乘諸通慧矣寶印手菩薩曰觀於群黎墮墜六趣而發愍哀惠施衆生授以法手其無信者爲造信手其少智者爲博聞手其慳貪者爲惠施手其犯戒者爲護禁手其瞋怒者爲忍辱手其懈怠者爲精進手其亂意者爲一心手其邪智者爲智慧手而隨衆生離清白法各各應時具設法手開士植斯德本之手印于三寶何謂三具立群生於佛智慧勸助至于寶印之

手成已德本則寶印手念一切法猶如虛空則寶印手興立如斯是則爲三則應大乘諸通慧矣師子意菩薩曰仁者當知彼無畏鎧是爲無懼所誓德鎧無饑礙鎧無怯弱鎧無懈怠鎧斯則佛慧是故行者不當恐怖無難無礙無怯無怠離諸厄懷衣毛不豎在於終始無有瑕穢亦不希仰泥洹之德等住苦樂而無二行則應大乘諸通慧矣師子步雷音菩薩曰仁者當知其斯事者非下才行則爲正士之所建造其正士者歸趣平等離于邪

見其正士者其心質朴而無諛諂其正士者
勞謙柔順尊師敬聖其正士者勸學不倦所
受根究其正士者欽悅正治建立正業其正
士者若有所欲捐廢穢法其正士者若有瞋
怒意無結恨其正士者若有愚癡照除幽冥
其正士者寂然憺怕近於定藏其正士者具
足恩惠施及貧厄一切輒濟其正士者護身
口意喟而靜冥其正士者言行相副情性質
直其正士者所至堅強尚真諦法其正士者
離於非法親存正典其正士者樂于法樂護

以正法其正士者輕忽身命不擇衆生其正
士者所立鏗然善施無羨其正士者志純淑
法消化凶僞其正士者則以寶藏救濟貧匱
其正士者則爲良藥療諸疹疾其正士者護
諸畏懼令得自歸其正士者導諸邪見至無
岸際其正士者勉濟勞穢勸以經典其正士
者調忍瞋怒而順所宜是故建立正士之法
則應大乘諸通慧矣虛空藏菩薩曰修以無
量虛空之慈其精進行未曾釋廢大哀之行
諸根悅豫悉懷踊躍於諸愛欲所可娛樂察

如虛空布施持戒忍辱精進一心智慧等如
虛空則應大乘諸通慧矣發意轉法輪菩薩
曰發菩薩意所發意者不當發意令魔得便
無令如來而不欣樂使諸天人所不悅喜不
令德本而有耗滅若欲興建為道意者隨順
誘勸當令弊魔不得其便順如來意天人悅
豫不失已身所造德本所修如斯一切發意
則轉法輪所以者何其菩薩者諸所發意因
緣所造如無所生曉了諸法永無所起無所
起者諸佛如來順如正覺之轉法輪如是發

心被戒德鎧則應大乘諸通慧矣辯諸句菩
薩曰正士當知其道心者正士普入塵勞終
害有漏無漏有為無為亦入於罪不罪殃福
亦入於善亦入不善亦入世法度世之法亦
入終始無為之為亦入斷滅有常之計亦入
諸陰衰入之事亦入地水火風所以者何以
諸因緣悉為自然志性本淨所在之處有所
言說一切所講皆悉為空而無所有譬如虛
空無所不入道心如是一切普至菩薩喜樂
如是慧者降棄一切文字辯才分別眾塵得

建辯慧若能入斯一聖達者則應大乘諸通
慧矣辯積菩薩曰一切所說皆無有言一切
音聲而不可得菩薩喜樂如斯慧者好言惡
言不悅不感譬如太山風來吹之尋復還返
山不動搖菩薩如是於諸異學一切語言不
動不搖在諸外徑亦無所住若如來言外徑
異語等法察之不以增減亦無所亂見諸辯
才一切法盡於諸盡法不念自大亦無所思
菩薩能行如斯慧者則應大乘諸通慧矣海
意菩薩曰菩薩所入當如入海覺了大道一

切聲聞所不能及信樂專心於一法味入若
干法無有若干觀深妙法未曾惑亂於緣起
法不增不減於諸經典無有若干是則名曰
不生不起一切衆生所起業者不植德本福
無有盡所教無邊當分別了棄捐斷滅有常
之事不受諸法不斷諸法當建立志為無量
器不忘捨法習諸通慧亦不釋法以平等法
為衆生說當習一切諸德善法如是具足無
數佛法以如是心被戒德鎧則應大乘諸通
慧矣太山菩薩曰仁者當知其此乘者普超

諸世則謂佛慧其行所入不可限量由是之故超度一切世間志性已能超度世間所行其所信者過於俗間已過俗間其所施者持戒忍辱精進一智慧亦復如是悉能超度一切世間之所有慧其所造福過於世間所興福祚則應大乘諸通慧矣喜見菩薩曰假使菩薩目所視色而無所惡色之自然其心清淨耳所聽聞亦無所惡音聲自然其心清淨鼻舌味身更心法於六情界如無所惡其六情界自然本寂其心清淨其於憎愛心

無所著其心清淨觀于衆生順佛法者器無不應又其衆生處邪見者亦復觀之在佛法器其愛已者在於王者歡喜習俗有所施與尋復悔者等敬若茲菩薩大士所行如是則應大乘諸通慧矣喜王菩薩曰假使有人罵詈誹謗輕易毀辱撻捶打撲於菩薩者心不懷恨而加喜悅以善友想待遇對者而能忍辱現于忍力其心欣豫思惟其法何所是罵誰爲罵者信解內空不疑外空自見己身又觀他人則歡喜悅便能惠施身命肢體頭眼

手足妻子男女國城丘聚財穀珍寶倍復踊躍寧聞一頌倏忽世榮轉輪王位常樂爲人講說經法不羨帝釋思開一人使發道心不僥梵天願見如來不貪三千大千世界滿溢琦珍從生明達不乏諸根信樂愛敬諸道品法如是悅樂所造行者則應大乘諸通慧矣察無岸菩薩曰假使見一切法度於彼岸不墮貪身淨諸佛土覩諸佛國皆亦清淨亦無想行見一切佛不發色想見衆群黎想雖有肉眼覩罪福淨具足天眼得無所壞雖得慧

眼離諸塵勞信樂佛眼具足成就十八不共諸佛之法已得法眼具足如來十種之力假使菩薩所被德鎧信行如斯則應大乘諸通慧矣遊無際法行菩薩曰族姓子知一切緣菩薩所爲則悉歸趣諸通敏慧所以者何觀諸所有一切因緣不住於內不處於外不在口言假使菩薩不住因緣亦不御趣塵勞之礙亦不勸導罪福之礙無報應礙無諸根礙無諸法礙無非慧礙已度罪福塵垢魔界則應大乘諸通慧矣超魔見菩薩曰惟族姓子

已住吾我自見已身則便處于魔之事業已
斷吾我不覩所虛已除所見則無諸陰已除
諸陰則不見魔已度魔界則尋速成無礙脫
門菩薩已逮無礙脫門則應大乘諸通慧矣
無憂施菩薩曰仁者當知其犯惡者後懷湯
火其爲善業後無憂感是故菩薩當修善業
其所作者無能說短所興造者後無所悔無
諸礙蓋假使衆生愁憂不樂則爲講說離憂
之法菩薩大士如是行者則應大乘諸通慧
矣諸告議菩薩曰惟族姓子其有士夫奉禁

戒者所願必獲已獲所願所獲立本由無放
逸立無逸已具道品法已能具立道品之法
則諸通慧戒禁之正也菩薩已住無逸道法
則應大乘諸通慧矣普華天子曰譬族姓子
樹華盛時多所饒益於一切人菩薩以功德
本而自莊嚴猶樹華茂饒益群黎如忉利天
晝度之樹紛葩茂盛忉利諸天莫不敬仰菩
薩如是以諸法門而自校飾諸天龍神捷沓
和世人阿須倫靡不宗戴猶如天上明月之
珠無有瑕穢衆德具足開士志性清淨無瑕

德義顯備則應大乘諸通慧矣光華天子曰
譬族姓子日出光明滅除衆冥終始光現菩
薩如是具足慧光慧法施世爲諸愚冥無明
衆生顯示大光導自然法其幽闇者不能蔽
暉其光明者則能消冥導示徑路已住徑路
菩薩大士其在邪徑示現正路已住正路則
應大乘諸通慧矣心華香天子曰譬族姓子
心華之樹其香普熏周四十里其香無想菩
薩如是以戒博聞定慧解度知見之香以爲
芬熏三千大千世界以法之香靡不周徧一

切衆病香即療愈假使菩薩被此法香則應
大乘諸通慧矣常進法行天子曰仁者當知
其精進者無懈怠心是故菩薩修諸德本而
不厭倦常當遵崇志八法行何等八六度無
極四等梵行遊步五通而以四恩救攝群萌
志三脫門逮得法忍勸勉佛慧開化衆生令
發道意導權方便接濟有爲所有諸法是爲
八遵崇八法之行則應大乘諸通慧矣於是
濡首語諸正士及天子曰仁者欲知菩薩精
進若不精進至諸通慧所以者何其翫習者

行在三界若遵修者謂諸往見其翫習者是
謂爲內亦不翫習是謂爲外其翫習者謂聲
聞地若遵修者謂緣覺地其翫習者謂在衆
結所行勤勞若遵修者則謂所著凡人之法
其翫習者則謂爲名若遵修者則謂爲色其
翫習者則謂報應若遵修者則謂所見其翫
習者謂有所著若遵修者則謂有所得其翫
習者則謂我所若遵修者則謂吾身其翫習
者則謂慳貪若遵修者則謂布施而不想慢
其翫習者則謂犯戒若遵修者則謂持戒而

不想慢其翫習者則謂瞋怒若遵修者則謂
忍辱而不想慢其翫習者則謂懈怠若遵修
者則謂精進而不想慢其翫習者則謂亂意
若遵修者則謂一心而不想慢其翫習者則
謂愚癡若遵修者則謂智慧而不想慢其翫
習者謂不善本若遵修者謂等善本而不想
慢其翫習者謂無福根若遵修者謂植德本
而不想慢其翫習者謂世俗法若遵修者謂
度世法而不想慢其翫習者謂有爲法若遵
修者謂無爲法而不想慢其翫習者謂爲罪

法若遵修者謂無罪法而不想慢其翫習者
謂諸有漏若遵修者則謂無漏而不想慢是
謂翫習至於遵修離諸所見不著不斷菩薩
旨趣則應大乘諸通慧矣又次仁者而不得
至於諸通慧何故不至以何等至諸通敏慧
諸通慧者離諸所作其諸通慧亦無所至亦
無有逮諸通慧者又諸通慧亦無色像亦無
痛癢思想生死識之形貌也其諸通慧者亦
無法則亦無非法其諸通慧亦無有施所以
者何諸通慧者則爲施與又諸通慧無有持

戒忍辱精進一心智慧所以者何諸通慧者
則自然聖諸通慧者無去來今所以者何其
諸通慧超度三世諸通慧者無眼耳鼻舌身
心識所以者何度諸界故諸仁欲知諸通慧
者若有菩薩欲得通慧住如通慧當云何住
於一切法而無所住斯則爲住於諸通慧一
切諸法皆非我所斯諸通慧於一切法無所
倚著斯諸通慧等凡夫地等於佛地於一切
法亦爲平等斯諸通慧又行菩薩不當於餘
求諸通慧惟當從此四大魅求自然造行所

以者何斯自然者此無所有斯自然者則無有形於是善法名曰我身於我身者而無有身無有善惡無我無壽無命無人假令我身則無所有亦復無有彼則無行亦無所有彼所有形則亦無實其所見者亦無所有亦無有實其慧見於所有無有有實無實等斯諸慧則諸通慧濡首童真說是語時二千大子得不起法忍萬二千人皆發無上正真道意化佛品第二

於是辯積菩薩白濡首童真曰且當俱往觀

于如來面問大聖菩薩大士當興何行濡首尋於其處化作如來其體形像如能仁佛濡首童真謂辯積曰族姓子如來在斯何不啓問菩薩大士所設之行於是辯積問化如來唯然世尊菩薩大士當設何行時佛告曰如我所設菩薩亦當修如是行又問云何世尊所造立行其佛答曰亦不行施不行禁戒不行忍辱不行精進不行一心不行智慧不行欲界不行色界不行無色界不造身行不造言行心不念行一切無行亦無因緣是菩薩

行於族姓子心趣云何其化現者豈有行乎
答曰天中天化者無行報曰如是族姓子菩
薩大士當造斯行辯積菩薩白濡首曰今所
見佛將無化乎濡首答曰仁者不聞一切諸
法化自然乎幻變之相而不退轉報曰如是
諸法實化自然幻變而不退轉答曰今族姓
子何故發言今現如來將無化乎一切諸佛
及一切法豈不化耶又問誰爲化者答曰自
然業淨而化之耳又族姓子菩薩不當住於
我人壽命佛之聖道及凡夫者而計有住辯

積問化如來世尊何學自致得佛答曰無所
學者則菩薩學菩薩所學無有形像亦無倫
比亦無所受亦非不受亦無想念亦不離想
亦無所行無行不行則菩薩學無著不著無
慢不慢亦不調戲亦不遵修不離遵修無想
無取無所遊居亦無有想不起不滅不來不
去無住無化亦無有形亦無言辭普離一切
諸所想行則菩薩學其作斯學是爲等學造
斯學者則無所趣則無所增亦無所損造斯
學者亦無所著亦無所脫亦無所染亦不離

塵亦無結恨不墮愚冥如是學者乃謂爲學
學如斯者不諳諸趣是故族姓子菩薩大士
欲得速成無上正真道者學我所學又問云
何佛學答曰如我無戒亦無所犯不施不受
不戒不犯不忍不瞋不進不急不憚不亂不
瞋不愚無學不學無所不行而吾無得亦無
所等無佛無法亦無我想亦無人想亦無壽
想亦無命想亦無法想亦無有想亦無無想
所以者何一切諸法悉無所造一切諸法以
無所造自然如幻亦無有想亦無有二一切

諸法離諸所樂一切諸法而不可見一切諸
法超度眼句諸法平等而無差特諸法愚冥
亦無所徑無爲無人故無人言教故無處所
無有言教則無所生其信此者不念所信亦
不自大亦不念道是故族姓子若有菩薩如
是比類學佛道者不恐不懼不難不畏乃爲
菩薩如族姓子虛空之畏不畏於火不畏於
風不畏於雨不畏於霧不畏於塵不畏於雷
不畏於雲不畏於電不畏於雪所以者何空
者自然故曰空畏菩薩如是於一切法而無

所畏於一切法不念苦樂假使菩薩心等如此則能成佛降伏衆魔則成無上正真之道爲最正覺亦能導利一切衆生時化如來說此語竟尋即化滅不知其處辯積菩薩問濡首曰今者如來爲所至湊答曰從所來處又問何所從來答曰如所去處又問濡首其化現者無所從來無所從去答曰族姓子譬如化者無所從來無所從去一切諸法亦復如是一切衆生等無有異不來不去又問濡首一切諸法爲何所趣答曰所趣自然又問一

切衆生爲何所歸答曰隨其所作又問濡首一切諸法無作無報答曰族姓子其法界者無作無報無往等御諸法則爲法界又問云何言有作有報有往而謂無往答曰族姓子如其所作如其所報所往亦然又問濡首曰何謂爲作云何報應何因所往答曰如所作者報應亦如所往亦如又問濡首其如無本者亦無有作無有報應無有往趣答曰如族姓子如無本者亦無所作亦無報應亦無往趣所作報應往趣亦然無來無去所作報應

段一

十四

所往至處其如無本無所歸趣說是語時如
在世尊能仁佛前賢者舍利弗賢者阿難及
餘大弟子悉聞斯講舍利弗白佛唯然如來
恠未曾有斯諸正士爲大聖人而師子吼等
同一法說若干種音聲言說與法合同而無
錯謬誰聞斯者不發無上正真之道乎佛告
舍利弗誠如所云菩薩大學無罣礙故今者
所說無所罣礙如其所種必獲其果如其所
出報應亦然菩薩如是學無罣礙從其聖慧
如分別說如舍利弗本所學禁自故斯慧辯

才亦然光淨菩薩問世尊曰何謂聲聞學何
謂菩薩學佛言有限有礙是聲聞學無限無
礙是菩薩學其聲聞學因其所限而致罣礙
由是之故所說有限致於罣礙而諸菩薩學
無有限致無罣礙由是之故所說無限無有
罣礙毀一光淨菩薩前白佛言惟天中天願現感
應使諸正士來至於斯令此衆會聞所說法
各得其所無令唐舉所以者何濡首童真所
行深奧所論經法亦復要妙爾時世尊即現
瑞應濡首尋時與二十五正士及諸天子往

詣佛所稽首足下遷住一面光淨菩薩謂濡首曰仁者何故越如來會獨於屏處而論講經濡首答曰族姓子知如來甚尊而不可當諸佛大聖由是之故一切所說或懼不可故在一面又問濡首說何所法可如來乎濡首答曰如吾所說世尊知之光淨曰雖爾願說其意答曰如吾所及今當宣現惟族姓子如有所說不違法界不失本無不失本際所說如是則可如來又若所說無所訟理無所呵吒無所興爲亦無因緣無有色像亦無比類

如是說者奉順如來無我同像無他人形不
等法貌無非法貌無終始貌無泥洹貌如是
說者爲可如來於是世尊告濡首曰善哉善
哉快說此言誠如所云如是說者不違如來
又次濡者假使悉離一切戲樂而無憤亂若
不本要離諸所想無有衆想有所說者所趣
寂然而不動轉被大德鎧定意說法無能毀
壞其經與者不見諸法有所增者有所減者
如斯所說則可如來說是語時八百菩薩得
不起法忍

奉鉢品第三

爾時天子千二百人在於會中乃於往昔造
菩薩行則忘道意志不堅固心自念曰佛慧
巍巍不可限量無上正真道意難可獲致菩
薩所學而不可逮最正真者甚難可得吾等
於是不能學辦以二不如改求聲聞緣覺而取滅
度爾時世尊知諸天子心之所念以此等倫
堪成無上正真之道為最上正覺而欲中廢
遂取小乘佛欲勸化諸天子故離於道場在
衆會表化作長者手擎滿鉢百種飲食贍諸

佛所白世尊曰惟願大聖加哀受食佛即取
鉢濡首菩薩興詣佛所叉手啓曰今食盛饌
當念感恩吾誠信聞大聖雖食而不以法惠
及於彼惟宜加施以法相惠剋復往意於是
賢者舍利弗心自念言濡首往故有何恩德
於世尊所而言雖食顧前法恩則白佛言濡
首童真宿有何恩於大聖乎而置如來雖當
食者念前法恩佛告且待斯須自當發遣如
來所知非爾所及佛即尋時捨鉢於地鉢即
下沒遊諸佛土諸佛正覺今現在者各各見

鉢降其足下在於下方過七十二江河沙等
諸佛國土至光明王如來國界號照曜鉢
住於彼處于虛空無執持者自然如立所往
諸佛諸弟子衆各各前啓問其世尊鉢所從
來諸佛各告說其意故上方世界界號爲忍
彼有如來名曰能仁現在說法能仁如來故
降斯鉢而欲勸化諸異菩薩志退落者於時
世尊告舍利弗汝行求鉢察知所在而赴致
來即時受教自以智力承佛聖旨三昧正受
以一萬定超萬佛土徧求索鉢不知所在還

遠一

十七

白佛言唯然世尊求之不見不知所在於時
世尊告大目連言汝今且行求索鉢來察其
所在爲處何方目連受教以神足力承佛聖
旨三昧正受入八千定倏忽超過八千佛國
求之不見不知所處還白佛言曰輒竭神力
不蒙執鉢焉能致乎世尊復告須菩提曰汝
行求鉢知其所歸索賈致來即亦受教三昧
正受萬二千定恍惚超越萬二千佛土求不
見鉢不知所止如是五百諸大聲聞在於虛
空各現神足三昧之力神通聖勢天眼徹瞻

各行求鉢不知所在亦不能得時須菩提即
前造白慈氏菩薩曰仁者高才一生補處如
來所剎當爲無上正真道成最正覺仁慈恩
廣智慧弘達衆所不及獨步三界而無有侶
當知鉢處惟能致之奉贄來耳幸屈威尊而
舉鉢還慈氏菩薩報須菩提曰誠如所云受
如來慧當成正覺今者濡首所興定意進止
坐起予所不及不能曉了於斯三昧惟須菩
提雖於來世吾當成佛佛菩薩衆數如江河
沙悉爲濡首之所開導欲知一步舉足所念

不識所歸是故仁者當請濡首惟斯大士知
鉢處所所止之土堪任致來時須菩提啓世
尊曰願垂恩教大聖則遣濡首取鉢濡首奉
命自思念曰吾不起座不離衆會而舉鉢來
濡首三昧名曰普超是諸菩薩定意正受於
時濡首伸其右掌而內于地過踰下方所經
諸佛無極大聖一一次第以手禮之其手掌
中自然有音稱能仁如來至真等正覺敬問
無量興處輕利力勢如常遊居安耶其掌手
臂一一毛孔尋自然出億百千炫光曜之明

一一光明各各變現百千蓮華一一蓮華各
化如來相好具足處蓮華上跏趺而坐一一
世尊各各讚揚能仁如來名德功勳所可遊
歷諸佛之土應時諸國六返震動又諸佛國
自然大光靡不周徧一切佛國各各而現有
斯手掌又諸佛土自然懸繒幢幡衆蓋莫不
莊嚴徧散衆華處處校飾濡首手掌過七十
二江河沙等諸佛國土禮諸佛竟斯須之間
忽然即至照曜世界光明王佛國禮畢自然
有大音出稱能仁如來敬問無量光明王如

來有侍菩薩名曰光英自啓如來此何手掌
殊妙巍巍威神難及而自然出億百千炫光
明暉赫一一光明而各化出億百千炫嚴淨
蓮華一一蓮華如來各坐咨嗟能仁聖詰之
勳光明王佛告光英曰有族姓子上方去此
七十二江河沙等諸佛國土有忍十九世界如來
至真等正覺號曰能仁現在說法彼有大士
名曰濡首被戒德鎧不可思議一切神通力
度無極自在於座而不移起延手掌來欲舉
鉢還時光明王佛土諸菩薩衆皆共渴仰欲

得覩見彼忍世界能仁如來濡首大士光明
王佛悉知衆會意之所見僥放眉頂相光其
光通照七十二江河沙等諸佛國土上至忍
界靡不晃昱其有衆生被蒙光者一切獲安
無有諸患如四域皇帝轉輪聖王諸修行者
專精學定被斯光者悉得道迹其得禪者悉
過三界獲四證德其漏盡者得八脫門禪定
羅漢得無著源其諸菩薩光照身者普皆逮
得日光三昧如是之比光明王如來佛土菩
薩大士見斯忍界世尊能仁濡首童真一切

聲聞比丘聖衆諸菩薩等光英菩薩覩忍世
界諸菩薩衆尋即淚出便說斯言白佛言曰
唯然世尊如妙水精如意明珠墮不淨中誠
可矜惜此諸菩薩生忍界者亦復如是甚可
憐感光明王佛謂光英曰勿宣是語所以者
何在此佛土精修禪行至于十劫不如忍界
從明晨旦至早食頃興發慈心哀念衆生此
之功德最勝無倫難可逮及所以者何斯諸
菩薩大士之衆無有陰蓋塵勞已盡其於忍
界護正法者德不可量爾時忍界諸菩薩衆

光明照身則問能仁天中天曰唯然世尊此
何光明孰演出來滅諸塵勞令無瑕穢時佛
告曰有族姓子下方度此七十二江河沙等
諸佛國土而有世界名曰照曜彼有如來號
光明王現在說法其光明王如來至真放眉
頂光其光通照七十二江河沙等諸佛國土
而大晃昱逮照斯土時諸菩薩及衆聲聞各
啓佛曰唯然世尊我等欲見照曜世界光明
王如來諸菩薩衆能仁如來放足心千輻相
輪光其光普照下方七十二江河沙等諸佛

毀一

二十

國土至照曜界靡不周徧下方世界諸菩薩
衆身蒙斯光皆悉逮得須彌光明三昧當爾
之時於斯佛土及彼世界斯土見彼彼土見
此轉相覩達猶如此土閻浮提人住於地上
仰瞻日月下方世界觀諸菩薩能仁如來及
忍世界亦復如是此土人民見於下方猶如
諸天住須彌頂頻于天下閻浮提域斯諸菩
薩見光明王如來諸菩薩等被大德鎧難及
難量於是濡首以右掌至照曜界彼光明王
如來佛土於虛空中即握取鉢與無央數億

百千姪諸菩薩衆眷屬圍繞踊出上方手掌
擎鉢所歷佛國轉來上者光明蓮華稍便不
現右手執鉢還忍世界於大聖前跪而奉授
啓世尊曰垂恩受之佛即受鉢時諸菩薩與
濡首掌而俱來者前詣佛所稽首于地各各
自宣如來之名其佛大聖致敬無量聖體勝
常遊步無限慧力平康諸菩薩衆敬問占畢
退坐一面如佛所教安隱之座爾時世尊告
舍利弗今且聽斯善思念之今爲若說乃昔
往古吾身造行爲菩薩時則是濡首本所建

發今者所以宣置斯意世尊雖食當念疇昔
法施之恩乃曩過去久遠世時無央數不可
計會億百千劫復踰此數爾時有佛名莫能
勝幢如來至真等正覺世界名無別異莫能
勝幢如來諸聲聞衆八萬四千菩薩大士十
二億衆其佛世尊於五濁世演三乘教有一
比丘而爲法師名曰慧王明旦著衣執持應
器入弘廣國而行分衛得百味飯若干種食
分衛竟出行於街路有尊者子名離垢臂爲
乳母所抱而行遊戲時離垢臂遙見比丘遊

行趣之下乳母抱尋隨比丘從求飯食於時
比丘與摸特蜜搏幼童即食知其甘美遂隨
比丘蜜搏欲盡顧眄乳母意欲還抱比丘復
授蜜搏幼童復進稍稍轉至莫能勝幢如來
之所稽首足下則住其前於時比丘慧王所
得分衛食饌授與幼童而謂之曰童子受斯
分衛之具供養如來尋即受之已滿鉢鉢食
不減損次與聲聞八萬四千菩薩十二億佛
及聖眾皆悉充飽如是之供至于七日飯則
如故亦不損減於時幼童踊躍歡喜善心生

焉住世尊前則而頌曰

佛聖眾飽滿 鉢食不損耗 奉事於眾祐

福田無有疑 世吼食充足 銷饌而不減

獻進于眾祐 不疑道無盡 其饌既不損

供具轉弘多 恭敬等正覺 增長清白法

佛告舍利弗於時幼童以一鉢食供養世尊

及諸聖眾承佛聖旨已心清白具足七日食

不損耗慧王比丘教訓幼童歸命於佛及法

聖眾令受禁戒剋心悔過勸使請問發無上

正真道意於是父母求索其子便詣莫能勝

憶如來所稽首作禮退住一面幼童拜謁問
訊父母以偈讚曰

我志願佛道

愍哀諸群生

閑暇難得值

親亦宜誓意

且觀正覺身

諸相好莊嚴

慧度於無極

孰不發道意

惟父母見釋

得出棄捐家

順妙智慧教

得學爲寂志

父母即答曰

我等好樂道

從爾爲明則

亦欲願捨家

佛告舍利弗於時幼童化其父母及五百人

悉念學法志於無上正真之道皆於佛世棄

家爲道時佛教之行菩薩道六度無極四等

四恩分別解空精進不懈自致得佛卿舍利

弗欲知爾時慧王比丘爲法師者豈異人乎

勿作斯觀所以者何則濡首童真也其離垢

臂尊者子者則吾是也昔往古世濡首童真

以饌見施毀一供養佛衆令發無上正真道意則

是本身初發意源以是之故汝當知之今者

如來所成聖覺無極之慧十種力四無所畏

十八不共無罣礙慧皆是濡首所勸之恩所

以者何因從發意至諸通慧如佛所蒙因致

大道今吾觀觀十方世界不可稱限不可計
會諸佛國土今現在者諸佛世尊同號能仁
悉是仁者濡首所勸或號盛聖或號明星或
名所歡或名錠光或謂離漏或謂妙勝佛告
舍利弗今我一劫若過一劫宣揚演說諸佛
名號濡首大士所開化者於今現在轉于法
輪不可稱限何況有行菩薩乘者或有處於
兜率天者或有退來入母胞胎而復出生捨
家爲道或坐佛樹或處道場成最正覺不可
限喻其有欲說誠諦之事審實無虛濡首童

真則諸菩薩之父母也愍哀勸化興顯大道
所生親者則當謂於濡首童真向者濡首宣
揚報恩今復申說雖當食者施我鉢饌所食
之餘吾前世時先有所施正謂於斯爾時千
二百諸天子欲墮落者各心念言當堅其志
恭敬於法除諸因緣去諸根原今者現在世
尊前所發願濡首勸化及開餘人使至于道
而不退轉於無上正真吾等云何而欲墮落
吾等何故在如來前興卑賤意志崇小節今
當捨於聲聞緣覺慙慙志求無上正真道意

普超三昧經卷第二

毀二

西晉三藏法師竺法護譯

幼童品第四

爾時世尊告舍利弗假使有人爲族姓子若
族姓女欲疾滅度當發無上正真道意所以
者何今吾覩見懼終始難而不肯發無上正
真道志願聲聞疾欲滅度續在生死而有所
慕然諸菩薩通達精進等住於法逮諸通慧
爲一切智所以者何乃往久遠過去世時不
可計會不可思議無央數劫時有如來號一

切達興出于世如來至真等正覺明行成爲
善逝世間解無上士道法御天人師爲佛衆
祐佛告舍利弗其一切達如來正覺聲聞集
會有百億衆其佛壽命住百千歲佛有聲聞
上首弟子智慧巍巍名曰超殊神足飄捷次
名大達於時如來興五濁世明旦正服著衣
持鉢與諸聖衆眷屬圍繞有大國號名聞物
入於斯城而行分衛其大聲聞智慧最尊侍
佛之右神足最上侍佛之左智慧博聞最殊
勝者隨從佛後八千菩薩而在前導或化現

身若如帝釋或如梵天如四天王或天子形
嚴治道路佛告舍利弗彼時如來向欲入城
見三幼童衆寶莊嚴瓔珞其身逍遙中路而
共遊戲時有一幼童遙見如來晃然顯赫威
神巍巍端正無倫諸根寂定忘性憺怕獲上
調順第一靜寔降伏諸根如仁賢龍象如大
淵渟清澄無垢有三十二大人相八十種好
徧布其體如日出時光曜奕奕與大衆俱如
星中月時一幼童謂二童曰汝等豈見如來
來乎是者則爲一切之尊無上衆祐爲世福

田光明灼灼燁燁難當吾等僉然宜供養之
其進施者利慶弘大以頌讚曰

斯者衆生尊 福田無有上 常共俱供養
施此祚無量

第二幼童曰

今我無異華 亦無雜澤香 斯聖無等倫

當何以供養

於是一童即脫頸上所著珠瓔價直百千以
頌讚曰

當以此供養 無上之福田 何所明智者

見斯有所悵

於時二童效彼童子各各解脫頸著珠璣以
手執持而歌頌曰

具供養正覺 度汎制江波 脫無量心意

住于平等法

爾時一童謂二童曰汝等以斯德本何所志

求一童子曰

其在世尊傍 右面大聲聞 智慧尊第一

吾誓願如斯

二童子曰

猶如世尊傍 左面大聲聞 神足超最尊

吾身願如斯

於時二童謂一童曰族姓子以斯德本欲誓

何願一童報曰

如今者如來 至真等正覺 普見一切達

段二

猶若師子步 照曜大衆聖 吾身誓若斯

三

三界尊第一 度脫諸十方

時一幼童適說此已尋虛空中八千天子俱

讚歎曰善哉善哉快說此言今仁發意天上

世間悉蒙救護佛告舍利弗時一切達如來

正覺邊有侍者名曰海意博聞最尊而告之
曰寧見三童各執珠璣而遊來乎對曰已見
天中之天世尊告曰比丘欲知中央幼童建
其志性巍巍難量一一步中超越百劫終始
之患其一舉足功德之本當更百臨轉輪聖
王受帝釋位亦復如斯昇生梵天爲梵天王
亦當如是一一舉足功德之本更見百佛時
三幼童往詣一切達如來所稽首足下以寶
珠璣散世尊上其發小意爲聲聞者所散珠
璣住兩肩上其一童發諸通慧心所散珠璣

在於佛上虛空之中變爲交露重閣棚帳四
峙周彰莊嚴平等化於其中而有牀座如來
處之於是一切達如來尋如欣笑侍者啓問
唯然世尊以何故笑笑會有意如來告曰海
意汝觀於斯二童發聲聞意手執珠璣散如
來手對曰已見大聖又告比丘欲知二童懼
生死難發怯弱意意求救護猶是不發無上
正真道意欲得聲聞爲尊弟子然後來世皆
當得證一者智慧最尊二者神足無雙佛告
舍利弗卿意疑乎時中央童發諸通慧者則

吾身是願右面童者舍利弗是願左面童者
大目犍連是舍利弗觀卿等本時懼生死難
雖植德本不能發無上正真道意心志怯弱
欲疾滅度不能超速甫因吾法而得無爲今
寧觀吾諸通慧耶汝等之友爲佛弟子乃得
解脫以是之故當作斯觀假使有人欲疾滅
度當發無上正真道意所以者何所言超速
謂諸通慧莫能過者諦而無欺其乘第一普
安一切羣生之類則諸通慧也爲最微妙特
尊無上爲無等倫無有儔匹爲無雙比無能

出過無量礙乘一切聲聞緣覺之乘所不能
及是則名曰諸通慧乘佛時說斯大乘法典
則一萬人發無上正真道意應時於彼諸大
聲聞賢者舍利弗大目犍連大迦葉離越阿
難律和利分耨文陀尼子尊者須菩提等自
投于地稽首佛足俱白世尊唯然大聖若族
姓子族姓女發大意者當供養之後微妙解
脫處至真行所以者何正使百千諸佛世尊
爲吾等說諸通慧行不能堪任無有勢力發
通慧心一切慧者無所量礙殊勝難及寧令

吾等犯五逆罪在於無間而不中止不捨於
無上正真道意而為聲聞所以者何設犯逆
罪墜于地獄受諸苦毒其痛會畢從地獄出
而不違遠無所罣礙諸通慧心計如今者當
何所施無所堪諧毀二焚燒正真敗壞根原於茲
佛慧無罣礙五智非是佛器譬如終歿之士無
益親屬吾等如是以聲聞乘而志解脫捨於
一切無益衆生譬如此地多所饒潤一切羣
萌二足四足若多足者如是世尊其發無上
正真道意天上天下蒙恩獲度

無吾我品第五

爾時世尊說斯本末向欲竟已王阿闍世乘
駟馬車將四部兵象車步騎往詣佛所稽首
佛足右遶三匝退坐一面白世尊曰唯天中
天衆生所住何所依因何緣而興何由得罪
佛告王曰以往吾我人壽命者衆生由此而
造罪疊依倚貪身興緣顛倒羣萌因斯而起
災患又問其貪身者根源所在世尊答曰其
貪身者無慧為本又問其無慧者何所為本
答曰所念邪友則是其本又問所念邪友何

所是根答曰虛偽是根又問虛偽何所是根
答曰無實諸想是則為根又問無實諸想何
所是根答曰謂無所有無覺是根又問何謂
無有無覺答曰謂無生無有是謂無覺又問
不生不有當何計之數在何所答曰其不生
不有彼無有計又問狐疑之事何因緣起答
曰其狐疑者從猶豫起又問猶豫為何所是
答曰賢聖所說誠諦之語聞則懷疑斯謂猶
豫又問何所賢聖何言審諦世尊答曰其賢
聖者謂除一切愛欲諸見其審諦者知一切

法悉無所有王阿闍世白世尊曰所謂賢聖
無所有者實為虛偽世尊安住從已勞塵而
造立之倚著於世聞諸賢聖所講說者而心
猶豫獲不可計殃疊之罪我父世尊久無愆
咎無所羈綴而危其命貪國土故惑於財寶
迷于榮貴荒於產業耽利宰民而圖逆害持
疑怵惕不能自寧若在歡會戲樂無娛若在
中宮嫪女熙遊若坐若卧有所決正若在獨
處聽省國事處羣僚上晝夜憂悸不能捨却
沉吟之結不歆飲食雖有美饌不以為甘其

毀二

六

目昧昧所覩普普顏貌憔悴心恒戰灼所處不安畏壽終後墜于地獄仰惟如來其恐怖者能使無懼其盲冥者惠授眼目其沉沒者而拯拔之遭苦惱者使獲大安無所歸者而受其歸其無護者而為救濟其貧窮者給施財業其有病者消息療治其墮邪徑示以正路其在正路為興大哀其心忍勞不以為患等恤羣黎其慈堅固究竟本末不以苦樂而有動轉如來所興救度眾生無所遺漏不捨一人私怙世尊垂恩安慰除其惶懼孤無有

救惟為作救令飢渴者而得飽滿今已虛乏而欲躋地惟蒙扶接今無所歸願受其歸今已沉沒願加拯拔我身得無墮大地獄至于無擇唯然大聖如應說法決我狐疑解散愁結令無猶豫使其重罪而得微輕於時世尊而心念曰王阿闍世所說聰達而甚微妙所入之法甚為優奧其餘人者莫能堪任為決狐疑令無餘結其惟濡首能雪滯礙時舍利弗承佛聖旨謂王阿闍世欲辯疑惑當饌餽饌請濡首童真則當決王虛偽塵勞狐疑之

數二

七

結鎮安國土及與中宮受王牀榻衆諸供饌
中宮嫗女及諸侍從獲無量福羅閱祇城摩
竭大國無數衆生皆享利義阿闍世王即前
啓白濡首童真唯加愍哀與其營從受小食
食濡首答曰大王且止已具足供於王法律
未有是記受于衣服若食饌具希望加哀王
則又白當何陳露呈現丹赤濡首答曰假使
大王日聞深法殊特真義不恐不怖不以畏
懼不以震懾不難不懼乃爲加哀正使大王
不想念法亦非無想無想不想如是行者乃

爲加哀縱使大王不想去心亦無不想不念
來心亦無不想於現在心亦無所受乃爲加
哀設使大王不墮邪見亦不滅除亦無所見
亦無不見乃爲加哀王阿闍世又白濡首曰
今之所說悉法所載惟見愍傷當受其請濡
首答曰王當知之法律所載不以恩施供養
分衛食衣之饌若使大王不計有我不計有
人不計有壽不計有命乃爲加哀爲受供施
設使大王不自愛身不愛他身悉無所取乃
爲加哀假使大王不攝斂心不計因緣不在

陰種諸入之事無有內法無有外法不受三界不度三界無善不善無得不得不處於世亦不度世無罪無福亦無有漏亦無不漏亦不有爲亦不無爲不捨生死不受滅度是爲加哀王答曰唯然濡首吾當啓受如斯法義以是之故當就余請哀垂愍傷下劣徒類濡首答曰王當了之設使諸法所有倚者所有受者有所得者有所救護則不蒙哀不得至安如使於法有所著者而爲想念有所立處而爲放逸皆爲依著想念有處放逸之護設

使大王究竟望畢極至永安乃無有患如令大王復有所作則不荷哀不至安隱王阿闍世又問濡首曰受何所法而無所患至無所有濡首答曰若了空者而無所作亦無不作無相無願亦無有作亦無不作若使大王有所造立而爲行者身口意行則是所作假令不有所作亦無所行以身口意而無所造則無所作是故大王一切諸法悉無有相其無所行無所有者則是其相又問濡首何謂所行而無所不行有所造亦無不造不增不減

濡首答曰假能不念過去已盡不念當來未至不念現在而無所起不想有常無常是爲無行亦無不行其能等色於諸因緣而爲衆緣不增不減又問濡首塵勞之欲爲是道乎云何與合濡首答曰王意云何其日明者與冥合耶答曰不也日明適出衆冥昧滅王寧別知冥所去處乎在於何方積聚何所答曰不及濡首曰如是大王興道慧者塵勞則消不知塵勞之所湊處亦無有處無有方面以是之故當了知之道與塵勞而俱不合又等

巽二

九

塵勞則名曰道等於道者塵勞亦等塵勞與道等無差特一切諸法亦復平等假使分別如斯義者塵勞則道所以者何以塵勞故現有道耳塵勞無形亦無所有求塵勞者則爲道也王又問曰云何求於塵勞而爲道乎濡首曰設有所求不越人心亦不念言是者塵勞是爲道也以是之故塵勞爲道其塵勞者亦入於道王又問曰云何塵勞而入於道云何爲行濡首曰於一切法而無所行乃爲道行於一切法亦無不行是爲道行王又問曰

行道如斯為何歸趣。濡首曰：如是行者為無所趣。王又問曰：道豈不至泥洹乎？濡首問王：寧有諸法至滅度乎？答曰：不也。濡首曰：是故大王至無所至，為賢聖道。又問曰：其賢聖者為何所處？濡首曰：其賢聖道則無所住。又問曰：其賢聖道不處禁戒博聞之慧乎？濡首曰：賢聖戒者無有行相，無放逸相，為聖定意，無所著相，為聖定意，無所念相，為聖智慧。王意云：何其無所行，無有放逸，有所處乎？答曰：不也。濡首曰：以是之故，王當知之。無所住者，則

賢聖道。王又問曰：族姓子、族姓女云何向道？濡首曰：假使所不求，不覩法有常，無常亦無所得，不計諸法有淨，無淨有空，無空若我無我，若苦若樂於諸法者，亦無所得，不見諸法在於終始。若滅度者，如是行者為向於道。王阿闍世白：濡首曰：以是之故，唯當受請。因斯使余離諸顛倒，令得解脫，分別淨行，與諸眷屬而就宮食。濡首曰：向者說之悉無所有，無有生者，無有善哉，與不善哉，其無所有，無有解脫。是解脫者，則無所有，亦無解脫，亦無解

脫者所以者何一切諸法皆自然淨爾時世尊告濡首曰受阿闍世王請以此之緣令無數人速得利義至安隱度濡首童真見世尊

勸則言惟諾當受其請不敢違失如來教故阿闍世王歡喜踊躍已見受請善心生焉稽首佛足及濡首童真一切聖衆便退還出請舍利弗濡首眷屬爲有幾人舍利弗答曰五百人俱而當往就王入于城還於宮中即夜興設若干食饌百種之味施五百榻無量坐具而敷其上莊嚴宮殿懸繒幡蓋燒名雜香

而散衆華及四衢路普一城內皆悉掃除灑以香汁令國人民男子大小莊校嚴飾賣持香華咸俱奉迎濡首童真

總持品第六

於是濡首於初夜中從其室出而自念言吾

毀二

十一

身不宜與少少人眷屬而俱就於王請今吾且當詣異佛土請諸菩薩皆令普聞講說經法斷諸狐疑就阿闍世王宮而食濡首童真如勇猛士屈伸臂頃忽然不見斯須超越八萬佛國至於東方常名聞界其佛號離聞首

如來至真等正覺今現在說法爲諸菩薩說
清淨典其佛世界如來一時等轉六度無極
自然通達具足廣宣不退轉法其佛國土一
切諸樹若干種華果實茂盛每從其樹常自
然出佛聲法聲不退轉輪菩薩衆聲是故世
界號常名聞斯道寶聲常不斷絕故故曰常
名聞濡首童真詣離聞首佛所稽首足下白
其如來唯然世尊遣諸菩薩與余俱往至于
忍界詣阿闍世宮而就其請離聞首如來告
諸菩薩曰諸族姓子與濡首俱詣忍世界從

意所樂於是會中二萬二千菩薩大士同時
發聲應唯然世尊我等願與濡首俱詣忍界
於是濡首與二萬二千菩薩從常名聞國忽
然不現至於忍界自處其室濡首會諸菩薩
大士而於初夜說總持法何謂總持所以總
持統御諸法心未嘗忘所志無亂其心未曾
有捨廢時學智慧業精覈諸法審諦之義分
別正慧得果證者但文字耳度至寂然條列
一切諸法章句攬賢聖要不斷佛教不違法
命攝取一切賢聖之衆於諸經法部分典籍

入於一切殊絕智慧不著衆會亦無怯弱遊
步衆會宣揚經典無所畏憚出諸天音料簡
明智於天龍神阿須倫加留羅真陀羅摩休
勒究暢其音而爲說法出釋梵音覺了平正
知諸根源識練邪見諸所立處總持觀察一
切衆生根源所趣所住等心於世八法而不
動轉具足一切真正之法隨其罪福報應果
證而爲說法興發衆生之造志業立諸羣黎
處於禁戒其慧普入爲諸衆庶代負重擔不
以勤勞而有患猷解脫諸法本性清淨以斯

毀二

十二

本淨而爲人演以本淨慧解脫道義慧無罣
礙習設法施其心堅固未曾懈倦有所說者
無有疑結不貪一切供養利入而不忘捨諸
通慧心力勵集累衆行慕靜布施無猷而每
勸助於諸通慧禁戒無猷以斯勸化一切衆
生忍辱無猷求佛色像精進無猷積衆德本
一心無猷修行專精使無衆冥智慧無猷入
一切行以道法業於此一切而無所生諸族
姓子所謂總持攝取一切不可思議諸法要
義持諸法無所行無行故曰總持又族姓子

其總持者攝持諸法何謂總持諸法攬執諸法一切皆空攬執諸法一切無相攬執諸法一切無願離諸所行寂寞無形悉無所有亦無所覺亦無所行無有處所亦無所生亦無所起亦無所趣亦不滅盡無來無往亦無所壞亦無所度亦無所敗亦無所淨亦無不淨亦無所嚴亦無不嚴亦無所著亦無所有亦無所見亦無所聞亦無所志亦無所教亦無有漏亦無想念亦不離想無應不應亦無顛倒亦無滿足無我無人無壽無命亦無放逸

亦無所受亦無所取亦無殊特猶如虛空無有名聞亦無所獲無所破壞亦無有二審住本際一切法界一切諸法住於無本是謂總持又族姓子一切諸法譬若如幻而悉自然總持諸法自然如夢自然如野馬自然如影自然如響自然如化自然如沫自然如泡自然如空分別諸法而如此者是謂總持濡首曰譬如族姓子地之所載無所不統不增不減亦無所置不以爲歇假使菩薩得總持者則能利益一切衆生恩施救濟無央數劫衆

德之本至諸通慧而心總持亦無所置不以爲獸譬如族姓子於斯地上一切衆生而仰得活兩足四足靡不應之菩薩大士得總持者亦復如是於羣生類多所饒益譬如族姓子藥草樹木百穀衆果皆因地生假令菩薩逮得總持亦復如是便能興闡一切德本諸佛之法譬如族姓子地之所載亦無所置亦不憂感不動不搖不以增減菩薩如是亦無所置不以憂感不增不減亦不動搖譬如族姓子於斯地上悉受天雨不以爲獸菩薩如

是逮總持者悉受一切諸佛典誥及諸菩薩一切緣覺聲聞之法餘正見士平等行者沙門梵志一切衆生天上世間聞其說法不以爲獸聽所說經不以爲倦譬如族姓子地之所種皆以時生不失其節亦不違錯應時滋長菩薩如是逮得總持統攝一切諸功德法十四不侵欺人亦不失時具足所行坐於佛樹處在道場至諸通慧譬如族姓子勇猛高士在於邦域而人戰聞降伏怨敵無不歸依菩薩如是得總持者處於道場坐於佛樹降伏衆

魔譬如族姓子檢一切法有常無常若微妙者安隱非我及計無常及諸瑕穢及苦非我所以者何惟族姓子以離二故則謂總持譬如族姓子虛空無不受持亦非總持亦無不持菩薩如是得總持者攬攝一切諸法之要譬如族姓子一切諸法及諸邪見皆悉爲空悉總持之菩薩如是得總持者無所不攬總持如是救攝一切諸法之義是爲族姓子計總持者無有盡時以無有盡則無放逸以無放逸則處中間以等處者則無有身則處空

界以如虛空虛空及地則無有二濡首童真說此言時五百菩薩得斯總持

三藏品第七

時濡首童真於中夜爲菩薩大士講三篋藏菩薩秘典何謂菩薩篋藏秘要觀諸經法無

毀二

十五

不歸入於此篋藏若世俗法度世法有爲法無爲法若善法不善法有罪無罪法有漏無漏法悉來歸趣入菩薩藏所以者何菩薩篋藏經典要者曉了一切諸法之義譬如族姓子此三千大千世界百億四天下大地百億

日月百億須彌山王百億大海悉包含入三千大千世界爲一佛土如是族姓子若凡夫法及餘學法若聲聞法緣覺法若菩薩法及與佛法悉來入歸菩薩篋藏所以者何菩薩篋藏一切攝護聲聞緣覺將養大乘譬如族姓子其樹根株堅固盛者枝葉華實則爲滋茂又族姓子設有攝取菩薩篋藏菩薩大士則爲攝取一切諸乘將養一切衆德之法菩薩藏者名無量器所以名曰無量器者譬如大海受無量水爲包含器不可計寶諸龍鬼

神捷智和阿須倫加留羅真陀羅摩睺勒及衆生類在禽獸者含受此等爲無限器菩薩藏者經典秘要亦復如是爲無限施聞戒定慧度知見器以故名曰菩薩篋藏譬如含血之類生大海者以生於彼不飲餘水惟服海水菩薩如是行菩薩藏不於餘法有所造行惟常修行諸通慧義以故名曰菩薩篋藏又族姓子菩薩有斯三篋要藏何謂三一曰聲聞二曰緣覺三曰菩薩藏聲聞藏者承他音響而得解脫緣覺藏者曉了緣起十二所因

分別報應因起所盡菩薩藏者綜理無量諸法正義自分別覺又族姓子其聲聞乘無有三藏其緣覺者亦無斯藏有所說法菩薩究縛三藏秘要因菩薩法而生三藏聲聞緣覺無上正真道故曰三藏菩薩說法勸化衆生

毀二

十六

令處三乘聲聞緣覺無上正覺是故菩薩名曰三藏有此三藏無餘藏學何謂爲三聲聞學緣覺學菩薩學何謂聲聞學但能照已身行之相緣覺學者是謂中學行大悲者謂菩薩學至無量慧攝取大哀其聲聞者不學緣

覺之所學者亦不曉了其緣覺者不學菩薩所學亦不曉了又菩薩者悉學聲聞所導學者皆曉了之不願樂彼亦不勸助修其所行學於緣覺所導學者悉曉了之不願樂彼亦不勸化使修其乘又菩薩者學於菩薩當所學者悉曉了之願樂勸修其乘所行勸所行已則說聲聞所行解脫亦講緣覺所行解脫分別菩薩所導解脫如是族姓子其有曉了此所學者是則名曰菩薩篋藏如瑠璃器有所盛者應時一切示自然性如瑠璃色如是

族姓子菩薩假使入菩薩藏所可遊居於諸法者見一切法悉爲佛法菩薩假使入菩薩藏不覩諸法而有處所設有覺了諸佛乘者不見諸法之所像類其不學於菩薩學者則見諸法而有處所設學菩薩之所學者不見諸法而有處所設學菩薩之所學者不見諸法有所住處其不修行計斯一切皆爲自然如是族姓子假使菩薩入菩薩藏在在所行所遊諸法一切悉見諸佛之法假令菩薩入菩薩藏不見諸法有所像類設使曉了諸佛

毀二

十七

法者則亦不覩諸法之處學菩薩學不見諸法之所歸趣其不修觀彼則覩見一切諸法而有逆順一切衆生覩不順者菩薩皆見諸法順正覩於諸法無有一法非佛法者是故名曰菩薩篋藏又族姓子菩薩藏者說無涯底文字所演順而應時不可計量所立之處不可思議垂顯光明靡不通達無有邊際莫不照耀多所利益悉令歸趣於諸通慧而令羣萌悉樂無本假使有學於彼學者甫當學者一切悉當入此菩薩篋藏則至大乘已欲

學者方當獲者其不至者悉使得至而令普
入如是濡首爲諸菩薩衆集會者在於中夜
說菩薩藏經典祕要廣分別演義歸所趣
不退轉輪品第八

濡首童真復於後夜爲諸菩薩大士廣宣講
演不退轉輪金剛句跡何謂不退轉輪又族
姓子所以名曰不退轉輪者如令菩薩說經
法時若來聽者悉獲義歸不復迴還而便講
說不退轉輪令其信樂不退轉輪菩薩行者
不爲衆生造若干行不爲諸法修若干行不

於國土興若干行不於諸佛起若干行不於
諸乘行若干行一切所至而悉普見轉於法
輪不壞法界是謂乃爲轉於法輪是故名曰
不退轉輪彼所轉輪而無斷絕其輪修理無
有二輪其輪如是如悲哀輪其輪所趣自然
之義在已所至其輪所趣法界場輪又族姓
子假使菩薩信樂於斯不退轉輪則得解脫
已身之患則爲信樂一切所信一切所想如
來所興悉亦信之以信得脫於如來者無有
二脫亦不脫二如其如來相好解脫諸法之

毀二

十八

相一切法相信如來脫則無有相已離脫相則至自然濟于己身如是之行莫能脫者亦莫能踰於斯慧者是故名曰不退轉輪又族姓子不退轉輪不退于色色自然故痛想行識亦復如是識不退轉識自然故所以者何則不退轉一切諸法猶如無本則爲法轉是故名曰不退轉輪其法輪者無有邊限無維無隅無有斷絕無常輪故其法輪者亦無有門無有二故則法輪門其法輪者無能轉者無所轉故其法輪者亦無所說法輪無言故

其法輪亦無名稱無所顯曜輪無獲故又復計此不退轉輪入於空無所遊相故憺怕門者無來相故普有所至爲空相故一切等御本淨無相故是故名曰不退轉輪又族姓子不退轉輪有所遊者而有所至是故名曰不退轉輪有所捨施徑有所至是故名曰不退轉輪如是濡首謂諸菩薩又族姓子所以名曰金剛句跡一切諸法皆悉滅寂何謂滅寂一切諸法族姓子已了空者金剛句跡也消諸邪疑六十二故其無相者金剛句跡也斷

毀二

十九

才浪切
叶藏切
也
明覈下革切
也
覈考實也
攬盧敢切
總攬也
憚徒案切
畏也
篋藏詰
蹠仆也
必益切
震章刃切
震懼也
捩拔蒲涉切
捩救也
瞞蒙弄切
不明也
拯按拯之虔切
擢救也
切義
瞞瞞

永樂北藏

普超三昧經

第四一冊

普超三昧經卷第三

毀三

西晉三藏法師竺法護譯

變動品第九

爾時王阿闍世明旦早起詣濡首所而稽首
曰供具已辦時至可行賢者大迦葉晨朝夙
興著衣持鉢與諸比丘五百人俱欲入舍衛
大城分衛於中路念吾行分衛時如太早寧
可造見濡首童真適設斯念尋便往至則與
濡首言談叙闊演說堅要濡首而謂之曰唯
大迦葉晨何所湊答曰欲行分衛故來諮受

濡首曰今當就吾食所設饌與眷屬俱吾當
與仁分衛之具迦葉答曰供具已達吾以法
故而來至斯不以食饌又曰迦葉惟當受請
供受二事大法供養飲食之饌亦不擇法亦
不失食迦葉答曰鄙等之舉以用法故絕饌
不食盡其形壽志存於法所以者何不從他
人乃能得致如斯法門如從仁者所說正義
又問今者濡首及諸菩薩爲於何食濡首報
曰吾等所食及施與者亦不長益亦不耗減
不動生死不近泥洹亦不超度凡夫之地亦

不證明賢聖之法不越聲聞不捨緣覺吾等
當說彼之所請其布施者亦不淨除惠與所
識不損而益不至解脫於諸經法亦無所興
亦不得法亦無所釋迦葉答曰是為大施無
極之施已入無本之所致也爾時濡首心自
念言今日入城寧可如佛感動變化應時以
衆神足變動三昧而為正受適以是定為正
受時尋即一切於是三千大千世界普悉等
住平若手掌普此佛國其大光明靡不周徧
其在地獄遭苦患者即時休息畜生餓鬼諸

不安者尋獲安隱衆生之類心悉開解無姪
怒癡無慳嫉者亦無諛諂無有瞋恚憍慢之
結無所興起亦無熱惱爾時衆生展轉相瞻
如父如母親此三千大千世界六返震動欲
行天子色行天子悉來集會供養濡首鼓樂
絃歌倡伎百千雨於天華嚴治塗路濡首童
眞適興斯定從其室宇至于城門自然莊嚴
塗路平整既廣且長皆以七寶無央數珍若
干校飾自然出現不可計寶化為寶璽中生
蓮華芙蓉莖華充滿煒曄灑上化造珠交露

帳而起幢旛繒綵華蓋其塹周帀皆有欄楯
欄楯左右皆有寶樹而其高大以諸寶繩展
轉連綿繫諸寶樹一一寶樹邊有寶架皆置
香爐燒諸名香一一香爐燒諸香者聞四十
里諸樹中間化寶浴池有八味水滿其池中
底悉金沙以寶欄楯周帀遶池瑠璃爲岸悉
生青蓮芙蓉莖華諸寶樹下以寶爲地一切
寶地列寶香爐而燒名香一一寶樹五百玉
女儼然羅住各各建立布施之德濡首適以
斯定三昧正受應時即有爲彼異學外道之

師示現變化巍巍無量靡不亘然濡首童真
則從座起著衣持鉢而欲發行謂迦葉曰惟
大迦葉便可在前吾今尋後所以者何尊大
迦葉年旣耆宿素修梵行久爲沙門未見如
來而出家學計於世間所有羅漢皆從仁後
有所啓受以是之故宜當在前吾今在後迦
葉答曰計於法律不以年歲而爲尊長法律
所載智慧爲尊神智聖達乃爲可尊博聞才
辯乃曰爲尊諸根明徹乃曰爲尊法律所記
以斯爲尊由是計之濡首童真智慧巍巍博

卷三

二

聞普達辯才無礙曉了一切衆生根本以是之故最長弘遠仁爲大尊宜當在前余應在後今欲假喻分別此義迦葉又曰譬若師子之子適生未久雖爲幼小氣力未成其師子子有所遊步其氣所流野鹿諸獸聞其猛氣皆悉奔走若有大象而有六牙其歲六十又身高大若以革繩繫之三重聞師子子威猛之氣恐怖畏懼跳騰盡力斷三重繫馳走奔突入于山谷谿澗林藪巖穴之間若入大水而自沉沒樹禽巢翳走獸藏竄水居魚鼈潛

逃于淵又諸飛鳥翔翺虛空發意菩薩亦復如是假使發意智慧道力未孚無復成就心猶憍仰習師子步過諸聲聞緣覺之路一切衆魔自在宮殿悉懷恐懼不能自安設師子子見餘師子威力猛勢若師子吼聞其音聲不恐不怖亦不懷懼無所畏難益以踊躍衣毛悅懌乘其力勢亦當鳴吼如是濡首大士聞佛師子吼時不恐不怖亦不懷懼無所畏難歡喜踊躍安心生焉吾亦當習猶如今佛師子之吼假使有說平等正真聲聞緣覺如

來爲尊發意菩薩則是爲本斯言至誠平等
無邪所以者何由是出生一切諸法而普顯
現以故明知濡首爲尊其年幼少則是聖長
宜當在前吾當從後濡首童真尋在前行菩
薩次之諸聲聞衆乃繼其蹤濡首適向莊嚴
寶路則雨天華無數妓樂不鼓自鳴應時其
地六返震動其大光明靡不灼徹於時濡首
所現變化威神感動放大光明雨華香熏諸
音樂聲相和而鳴入王舍城王阿闍世籌慮
濡首與二萬三千衆菩薩俱及諸聲聞眷屬

毀三

四

圍繞而來進路即懷恐懼今吾整設五百人
供來者猥多安能周徧當焉所坐以何飼之
心又念言濡首童真果相疑誤則發此心應
時濡首威神聖德之所建立息意天王即自
化身金鉞神鬼現微妙體則謂王阿闍世曰
大王且止勿以爲慮無用勞悞濡首童真善
權方便智慧無極現大功德威靈赫奕恢闡
神力光祚堂堂昇路來臻一人之食能以周
徧三千大千世界衆生儔類悉令充滿何況
於斯二萬三千眷屬來者以是之故不足勞

慮大王且安勿復加供一切來者悉當豐足
所以者何濡首大賚求得無盡衆祐難量王
阿闍世應時踊躍不能自勝則以弘意念於
濡首如佛世尊王阿闍世與諸羣臣中官官
屬賁持華香雜擣澤香衣服之具幢幡繒蓋
效樂琴瑟笙篳篥奉迎濡首稽首禮畢侍從濡
首入城歸宮濡首與諸眷屬初入城時城內
烝民各賁所有以來供養時於會中有一菩
薩名曰普觀濡首告曰卿族姓子使其殿舍
包容會者尋即受教察其左右而普周觀阿

闍世殿自然寬大懸繒華蓋峙立幢幡其地
平博散衆華香復有菩薩名曰法超濡首告
曰卿族姓子嚴辦衆座應時受教舉手彈指
於彼殿館二萬三千牀座自然具足若干種
飾微妙莊嚴無數座具而敷其上濡首童真
諸菩薩衆悉來就坐聲聞次之王見濡首與
諸菩薩聲聞坐畢前自啓曰且待斯須增辦
供具濡首答曰大王自安自當備足勿以爲
勞時四天王與其眷屬悉來供侍濡首童真
又天帝釋良善夫人及餘玉女無央數千賁

持天上旃檀雜香蜜香擣香以用供散一切
菩薩及諸聲聞時諸菩薩見諸華香及諸玉
女無玉女想無華香想梵忍跡天化作梵志
摩納之形手執拂扇住侍濡首左面以扇扇
之諸梵天子各執拂扇侍諸菩薩立而扇焉
無熱龍王不現其身在於虛空垂貫真珠從
其貫珠出八味水清涼且美供給所當其諸
菩薩一切聲聞其前各各有垂貫珠而出美
水亦給所用王阿闍世心自念言是諸菩薩
而不賈鉢當於何食濡首知王心念而告之

曰斯諸正士有所遊至不賈鉢行所可遊行
諸佛國土適坐欲食鉢自然至斯諸菩薩本
所建立又彼如來昔所造願鉢從虛空來在
手掌王阿闍世問濡首曰是諸菩薩從何佛
國來世界名何如來正覺號曰何等濡首答
曰世界名常名聞如來號離聞首六今現在說
法是諸菩薩從彼而來就於仁食欲得聽省
王之狐疑所懷虛妄是諸菩薩志所建立如
來本願鉢於空中自然飛來投於無熱八味
浴池洗滌清淨詣諸族姓子二萬三千諸龍

婁女各賫諸香菩薩掌中時王見茲倍用踊躍則前稽首濡首童真濡首童真而告王曰可設供饌宜知是時王即受教則便陳列若干種食琦妙珍饈供具悉徧食不消滅如是阿闍世本所供施五百人饌悉令二萬三千皆得飽足飯食如故阿闍世王白濡首曰今饌如故而不消殢濡首答曰如今仁者狐疑未盡疑不盡故猶斯食饌用不消索時諸菩薩飯食畢竟尋以其鉢拋擲空中鉢處虛空無所依據而不墮落王阿闍世問濡首曰今

斯諸鉢為何所止濡首答曰猶如大王狐疑所存今此諸鉢亦處於彼時王答曰鉢無所立濡首答曰猶如大王所有狐疑亦無所立今此諸鉢無所依據而不墮落諸法如是悉無所有亦無所住以是諸法亦無墮落

卷三

七

決疑品第十

於是王阿闍世見諸菩薩及聲聞衆食訖澡畢更取卑榻於濡首前坐欲聽聞法惟願濡首解我狐疑濡首答曰大王所疑恒河沙等諸佛世尊所不能決時王自省無救無護從

榻而墮如斷大樹摧折躋地大迦葉曰大王
自安莫懷恐懼勿以爲懼所以者何濡首童
真被大德鎧善權方便而設此言可徐而問
時王即起問濡首曰向者何說江河沙等諸
佛世尊不能爲我而決狐疑濡首報曰王意
云何諸佛世尊緣心行乎答曰不也濡首又
問諸佛世尊發心行乎答曰不也又問諸佛
世尊滅心行乎答曰不也又問諸佛世尊行
有爲乎答曰不也又問諸佛世尊行無爲乎
答曰不也又問諸佛世尊所教行無爲乎答

曰不也濡首又曰王意云何其諸法者而無
有法無有行者無所歸趣寧能有人教化於
法決斷之乎答曰不也王當了之吾以是故
而說斯言王之狐疑江河沙等諸佛正覺所
不能決復次大王假使有人而自說言我以
塵冥灰烟雲霧汙染虛空寧堪任乎答曰不
能汙濡首又問設令大王吾取此空洗之使
淨寧堪任乎答曰不能濡首報曰如是大王
如來之身曉了諸法猶如虛空成最正覺自
然淨者無所染汙以是之故何所有法而染

汙者見逆限乎豈可決了若淨除乎大王等
觀於斯法義吾以是故向者說言江河沙等
諸佛世尊所不能決也復次大王諸佛世尊
不得內心而有所住不得外心而有所住所
以者何一切諸法自然清淨無有處所自然
淨者無有處所無有志願有所住者所以者
何得自在哉諸法自然故無自然哉諸法無
興立故無蹉跌哉諸法無所有故無所有哉
諸法離形貌故無形貌哉諸法虛無故無蔽
礙哉諸法無教相故無教化哉諸法自然無

所有故離所有哉諸法釋歸趣故無歸趣哉
諸法無別離故無別離哉諸法無所生故無
所倚哉諸法自然淨故心性淨哉諸法無分
如空等故無倫比哉諸法無伴黨故無伴侶
哉諸法離於二故無有二哉諸法法憺怕故無
量哉諸法無斷絕故無邊際哉諸法無涯畔
故無誠諦哉諸法顛倒從不誠諦而有所住
故無顛倒哉諸法常淨得安已故有常哉諸
法無歸向故清淨哉諸法本淨因明達故已
自然哉諸法無我而顯曜故安隱哉諸法無

想念故無猶豫哉諸法內寂然故無欺妄哉
諸法究竟無誠諦故靜寞哉諸法憺怕相故
無吾我哉諸法除於我故無穿漏哉諸法解
脫相故趣寂滅哉諸法離所念故無恐懼哉
諸法離若干故造一等哉諸法等御脫故恍
惚哉諸法不想本際故無有想毀三九哉諸法無壞
閑默緣故順空哉諸法離衆見故無有願哉
諸法離三世故斷三世哉諸法無去來今故
無爲等哉諸法究竟無生故王意云何彼法
無生亦無所起亦無所有無有真諦豈能有

人汙染之手答曰不也濡首曰彼法寧可決
斷不耶答曰不也濡首又曰一切諸法等如
泥洹如來解此致最正覺猶是之故王狐疑
者不可決斷是故大王不可修行有所造立
不從倒心當修造立真諦之觀觀於無本設
能察者則於諸法而無所受亦無所曉不與
遊居若使大王不與諸法俱遊居者斯乃爲
信其有信者乃爲寂寞其寂寞者乃自然淨
自然淨者乃無所造無所造者一切諸法則
無有主彼則造忍一切諸法無有造者王當

知之無所造者則爲滅度計彼諸法亦無所造無所破壞亦無有造亦無不造謂斯滅度假使大王順此脫者則平等脫已等脫者則於其法無趣無逮不增不減所以者何於一切法無所利義亦無所求諸法無本其無本者則無所生無所生者則亦無本其本無者等無差特故曰無本設使大王解信無本一切狐疑自然爲斷又若大王眼無染汙亦無所淨眼之自然爲無本故無本自然則曰眼矣耳鼻舌身心亦復如是心者大王無有染

汙亦無所淨心之自然爲無本故無本自然則曰心矣王當了之色無染汙亦無所淨色者自然爲無本故無本自然則曰色矣痛想行識亦復如是識無染汙亦無所淨識之自然爲無本故無本自然則曰識矣王當了之一切諸法無有染汙亦無所淨諸法自然爲無本故無本自然則曰諸法心無形色亦無可見無所危害無有處所無有言教譬若如幻不處於外不處於內心者本淨而自然明設心淨者則無染汙亦無所淨王當解此其

設三

十

本淨心不可染汙無有淨者無有虛妄亦無所著無所危害因無諦想而有所造無諦思想設有所住凡夫愚騃倚欲塵勞彼則何謂無有誠諦則而發起無誠諦想其無有誠者則不與諦一切諸法住不真諦以存於彼無誠諦想譬如大王喻此虛空無色無見不可執持亦無可捨亦無言教假使有人而說言曰今此虛空無色無見不可執持亦無所捨無有言教吾今欲以塵烟灰雲霧汙染虛空王答曰不能濡首曰如是大王心本之淨自

然顯明則不可以塵烟灰雲霧蔽礙汙之譬如塵烟灰雲霧住於虛空終不染空而爲垢汙如是大王發吾我想謂是我所因鑒緣結爲婬怒癡不汙心法自然之淨是故大王仁者於彼勿懷狐疑王欲知之其過去心及當來心則無形貌其當來心及過去心亦無形貌現在心者無所依倚亦無所有前心所念不礙後心後心所念不礙前心其現在心亦復如是明智於彼而造斯觀心無所有亦無不有過去心者已滅盡未來心未至現在心

無住觀見諸法當來無住蠲除諸見無所恠者爲解脫故清淨想者諸法離垢普等于世普等於明無所生者無有言教及無言教無處不處世尊所說寂然之義其寂然者計於彼法則無有處假使有人求處言教推索諸法設使大王在於諸法而無所念則除一切狐疑之結而於諸法無所決除所以者何其狐疑者與法適等而無差特故曰法界御於平等一切諸法及與法界於此諸法當御平等所以者何一切諸法則入法界設等法界

則等諸法是故名曰法界平等一切諸法其法界者等御諸法說是語時王阿闍世得柔順法忍歡喜踊躍心獲大安尋即叉手歎曰善哉快說斯言辯除余疑濡首答曰王當知之斯爲大冥狐疑之結也如王究竟釋一切法而說斯言善哉濡首快說斯言辯除疑惑王又答曰以爲滅盡吾諸陰蓋假使我身命終歿者則當至道濡首答曰是爲大王之甚疑礙乃欲究竟一切諸法至於滅度乃能希望想於泥洹究竟泥洹一切諸法而復望想

於滅度乎究竟泥洹者諸法本淨而無所生
爾時王阿闍世取濡妙衣價直百千即以手
持奉上濡首欲報法恩而覆其身濡首童真
忽然不現其身不見何所歸趣空中聲曰如
今大王而不覩見濡首之身觀其狐疑亦當
如斯如見狐疑見一切諸法亦復如是如觀
諸法所見如是見無所見又曰大王所見身
者以衣與之次于濡首右坐菩薩名慧英幢
王阿闍世以衣與之於時菩薩不肯受衣而
說斯曰吾不欲脫於所有亦不瞋恨亦不滅

毀三

十二

度吾亦不近於凡夫法而受斯衣亦不從度
凡夫行者不從學者亦復不從度塵法者不
從不學不從無學而度法者不從緣覺亦復
不從度緣覺者而受斯衣吾亦不從如來所
受亦不從度如來法者而有所受假使大王
不行斯法不捨此法吾乃從彼而有所受所
當受者若有施者俱同一等而無差特如此
施者則爲清淨衆祐所呪王阿闍世則以其
衣著慧英幢身即於座上忽然不現已於空
中復聞聲曰其身現者以衣施之次有菩薩

名信喜寂王阿闍世以衣施之其菩薩曰吾亦不從自見身如有所受不從見他不從見著塵而有所受不從離塵亦無從寂倚有所受不從無倚不從定意不從亂志不從智慧不從無慧而有所受王即以衣著菩薩上則亦無現而於空中毀三十三如有聲曰有現身者以衣施之次有菩薩名不捨所念王阿闍世以衣施之於時菩薩而不肯受而說斯曰吾不從倚身而有所受不從倚言不從倚心不從倚慧不從倚義不從倚陰不從倚種不從倚衰

入不從倚諦不從倚佛音聲而有所受所以者何一切諸法皆無所倚亦無所著究竟永安亦無震動王阿闍世以衣施之於時菩薩則亦不現空中有聲而語王曰其身現者以衣施之次坐菩薩名曰尊至王阿闍世以衣施之於時菩薩亦不肯受而說斯曰王當知之吾不從卑脫而有所受假使大王發於無上正真道心其心等者道意則等信道意等道已平等其心亦等已等道意諸法則等已能平等一切法者乃從受衣於一切法不受

不捨亦無所施脫於諸法而無有意亦無不
意觀一切法不見吾我不計吾我如是行者
乃從受衣王阿闍世以衣施之則便不現已
於空中如有聲曰其身現者以衣與之次有
菩薩名定華王王阿闍世以衣施之於時菩
薩亦不肯受而說斯曰假使大王行諸三昧
不於定意而有所懷信解諸法本淨平等無
有脫者我乃從彼而受斯衣王阿闍世以衣
著其身上於時菩薩則亦不現已於空中而
聞聲曰其身現者以衣與之次坐菩薩名無

逮得王阿闍世以衣施之時彼菩薩亦不肯
受而說斯曰假使大王於一切陰而信得度
文字音聲一切平等而不可得已見諸法無
所得者則使導利無所得義不御衆好不導
嚴飾作斯行者我乃從彼而有所受王阿闍
世以衣擲之時彼菩薩忽然不現已於空中
而有聲曰其身現者以衣施之次有菩薩名
淨三垢王阿闍世以衣施之時彼菩薩亦不
肯受而說斯曰假使大王不自得身亦無受
者其有施者亦無希望若如是者我乃受衣

毀三

十四

王阿闍世以衣擲之則亦不現已於空中而有聲曰其身現者以衣與之次坐菩薩名化諸法王王阿闍世以衣施之於時菩薩亦不肯受假使大王示現聲聞而般泥洹亦不滅度示現緣覺而般泥洹亦無滅度示現如來而般泥洹亦不滅度無終始法無滅度法吾乃受衣王阿闍世以衣擲之則亦不現空中聲曰其有現身以衣與之王阿闍世次第以衣施諸菩薩一一不現各各說曰其有現者以衣與之牀榻机案亦空不現王阿闍世謂

賢者大迦葉曰於今現者當受斯衣仁者最尊佛所咨歎宜當受之大迦葉曰吾姪癡無除盡也如今吾身不應受衣不捨無明不除愛欲不斷苦惱不滅於習爲不盡證亦不由路吾不見佛亦不聞法不御聖衆不釋塵勞不發思想不離思想不建立慧亦不離慧五眼不淨亦不造慧亦無所滅其施我者不獲大福亦非無福吾亦不在於生死法無滅度法其施我者不能究竟衆祐之德假使大王能行如斯等護諸義我受斯衣王阿闍世

跋三

十五

以衣擲之忽然不現在於空中而聞聲曰其身現者以衣與之王阿闍世次第施衣則各不現如是一切諸大弟子一一恍惚沒不復現盡五百人復聞聲曰王所見身以衣施之即自念言菩薩聲聞悉不復現吾當還與第一之后則入宮裏而徧觀察亦不覩見一切姝女王阿闍世便得親近如斯定意其目所瞻不見諸色亦不見男女不見童子不見童女不見大小不見牆壁不見樹木不見屋宅不見城郭續見身相復聞空中而有聲曰其

身現者以衣與之王即自著不自見身尋則雪除一切色相復聞聲曰假使大王不見諸色形像所有柔軟安隱觀於狐疑亦當如見狐疑觀一切法亦復如此如無所見者斯乃為見離於諸見設使離見有所見者則無所見不離諸見如是見者能為等觀設於諸法不有所見已無所見則為等觀於時王阿闍世皆離一切想念所著從三昧起尋則還復見衆會者諸后姝女城郭殿宅亦復如故王阿闍世白濡首曰向者衆會為何所湊又曰

在吾前而不見之濡首報曰猶如大王狐疑所湊其衆會者向在於彼又問大王見衆會乎答曰已見濡首問曰云何見如見狐疑覩衆會者亦復如是又問以何等見於狐疑乎答曰如覩會者目前所見諸形色者狐疑亦然不見內外又問大王世尊說曰其犯逆者不得中止處無有間王自知當至地獄乎王尋答曰云何濡首如來至真成正覺時豈見有法歸因圖乎斯趣三塗斯趣天上斯趣泥洹乎答曰不也大王濡首察見吾今覺了一

毀三

十六

切諸法所覺了法於諸經法亦無所得趣於地獄若生天上般泥洹者一切諸法皆悉爲如若分別空之所歸趣瞻於空者無趣地獄不至天上不歸泥洹一切諸法無所破壞一切諸法悉歸法界其法界者不歸惡趣不上於天不歸泥洹其逆無間則謂法界諸逆之源則謂法界其本淨者則謂諸逆其諸逆者則謂本淨是故言曰諸法本淨是故濡首一切諸法至無所生由斯自知不歸惡趣亦不上天不昇泥洹濡首答曰云何大王亂佛法

教答曰吾亦不違世尊教命不說佛法所以者何世尊分別演無我際說真諦源已無有我彼則無人人無所有衆生虛無而有實如是計之則無所造亦無作者亦無受者又問大王狐疑斷乎答曰已究除矣濡首曰云何大王猶豫絕乎答曰永絕濡首又問今王云何於衆會中知王有逆而言無逆答曰不也又問云何答曰其已逆者脫於無結而造證者彼諸逆者斯會逆者其諸逆者則是菩薩柔順法忍而令衆人得入斯忍不當於彼

毀三

十七

攬持諸逆濡首所謂逆者從彼至斯無有諸逆以是之故不當彼於總攝諸逆時慧英幢菩薩舉聲歎曰以爲嚴除大王之路乃能遠得如斯法忍王則答曰一切諸法本末悉淨又一切法究竟閑默無所染汙以是之故不可染汙而爲作垢無所著道斯名曰道又彼道者不歸生死不至泥洹諸賢聖道無導御者無所起道斯名爲道道無有道王阿闍世說斯言時逮得明達柔順法忍於時中宮三十二女見濡首威神變化皆發無上正真道

普超三昧經卷第四

放鉢經同卷

發四

西晉三藏法師竺法護譯

心本淨品第十一

爾時濡首爲王阿闍世及諸眷屬并餘來者
無數之衆開化說法即從座起與比丘衆王
阿闍世羣臣僚屬及無數人出宮門行行於
塗路見一男子自害其母住他樹下啼哭懊
惱稱叫奈何其人究竟現在應度而自剋責
所作無狀而造大逆自危其母當墮地獄雖
爾其人當修律行時濡首於比丘衆前化作

異人即時往詣害母人所去之不遠而中道
住其害母者遙見父母與子共侶父母謂子
是者正路其子答曰斯非正路遞互起諍於
是化子現懷瞋怒殺化父母其逆罪子遙見
化子害化父母啼哭酸毒不能自勝尋即往
詣害母人所而謂之曰我殺父母當墮地獄
哭言奈何當設何計其害母者而自念言今
此來人乃害二親我但危母其人癡冥罪莫
大焉我之爲逆尚差於彼如彼受罪吾猶覺
輕其化人者悲哀酸酷口並宣言吾當往詣

能仁佛所其無救者佛爲設救其恐懷者慰除所患如佛所教我當奉遵於時化人啼哭進路在其前行而害母者尋隨其後如彼悔過吾亦當爾吾罪微薄彼人甚重化人詣佛稽首于地而白佛言唯然世尊吾造大逆而害二親犯斯大罪佛告化人曰善哉善男子爲至誠而無所欺言行相副諸如來前說誠諦言而不兩舌亦不自侵當自惟察觀心之法以何所心危二親者用過去心當來心乎現在心耶其過去心即已滅盡其現在心即

已別去無有處所亦無方面不知安在當來心者則亦未至無集聚處未見旋返亦無往還子當知之心亦無立於身之內亦不由外亦無境界不處兩間不得中止察其心者亦無五色青赤黃白黑子當了之心者無色亦不可見亦無所住亦不退轉無有言教不可執持猶若如幻子欲察心不可分別不可解了不可名姪不可究怒不可知癡無姪怒癡子當知心之無生死行亦無所作亦無所現亦不現在心者清淨亦無垢染亦無淨者心

毀四

二

不在此亦不在彼不在異處猶如虛空亦無等倫亦無色像亦無言教有明智者不當依倚勿得言吾謂是我所莫得造處無得爲想莫造畢竟勿有所爲無言已身勿云吾我莫念過去所以者何子當知之一切諸法悉無所住猶如虛無子且聽之解如是者佛不謂人於法有脫若汙染者不歸惡趣設心清淨而無垢染則無諸趣於是化人即而歎曰得未曾有天中之天如來所因成最正覺了知法界無有作者亦無有受無有生者無滅度

者無所依倚願得出家因佛世尊得作沙門受具足戒佛言比丘善來於時化人前作沙門即白佛言唯然世尊吾獲神通今欲滅度佛之威神使彼化人去地四丈九尺於虛空中而取滅度身中出火還自燒體於是逆子見彼化人得作沙門聽受經法聞佛所說心毀四自念言向者彼人自危二親在世尊前而作沙門便得滅度今吾何故不效彼人而作沙門亦當滅度作是念已往詣佛所稽首聖足前白佛言我亦造逆自危母命佛言善哉善

男子爲至誠而無所欺言行相副詣如來前
說誠諦之言而不兩舌亦不自侵當自惟察
觀心之法以何所心危其親者用過去心當
來心乎現在心耶其過去心即已滅盡其現
在心即已別去無有處所亦無方面不知安
在當來心者則亦未至無集聚處未見旋返
亦無往還子當知之心亦不立於身之內亦
不由外亦無境界不處兩間不得中止察其
心者亦無五色青赤黃白黑子當知之心者
無色亦不可見亦無所住亦無退轉無有言

教不可執持猶若如幻子欲察心不可分別
不可解了不可名姪不可究怒不可知癡無
姪怒癡子當知心無生死行亦無所作亦無
所現亦不現存心者清淨亦無垢染亦無淨
者心不在此亦不在彼不在異處猶如虛空
亦無等倫亦無色像亦無言教有明智者不
當依倚勿得言吾謂是我所莫得造處無得
爲相莫造畢竟勿有所爲無言已身勿云吾
我莫念過去所以者何子當知之一切諸法
悉無所住猶如虛無子且聽之解如是者佛

不謂人於法有脫若染汙者不歸惡趣設心
清淨而無垢染則無諸趣於是逆人地獄之
火從毛孔出毒痛甚劇而無救護前白佛言
我今被燒唯天中天而見救濟歸命大聖於
是世尊出金色臂著實人頂上火時即滅無
復苦痛見如來身若干相好身痛休息而得
安隱又前白佛欲作沙門佛尋聽之即為寂
志於時世尊為說四諦其人聞之遠塵離垢
得法眼淨修行法教逮得往還證得羅漢又
白佛言欲般泥洹世尊告曰隨意所在於是

毀四

四

比丘踊在虛空去地四丈九尺身中出火還
自燒體百千天人於虛空中而來供養時舍
利弗見於彼人受斯律教而得滅度則驚恠
之前白佛言誠難及也天中之天如來恩施
所說法律乃令逆者得受法教如是行者然
有殊別堪救濟者惟有如來濡首童真被大
德鎧諸菩薩倫能觀一切羣萌根源隨而度
之非諸聲聞緣覺境界佛言如是舍利弗誠
如所云是佛大士法忍菩薩之境界也又舍
利弗汝等所見想墮地獄而佛觀之至滅度

法汝等視人應滅度者世尊省知而墜惡趣或以知足有德之士閑居奉戒而三昧定汝等謂之至滅度法如是見之反墮地獄所以者何汝等之類離於心行不能徧察衆生心源羣萌所行不可思議又舍利弗汝爲見此殺母者乎聞說深法得至無餘而般泥洹對數四曰唯見天中之天佛告舍利弗欺害母者於五百佛植衆德本聞深妙法解暢心本清淨顯曜又如其人入此典誥受一切法而得解脫佛言舍利弗以是之故若族姓子族姓女

我滅度後能聞是法義即便信樂又人迷惑而心乖者隨惡知友而犯罪疊不失法忍乃至無餘而得解脫吾不謂斯等墮惡趣也有信樂如是像類深妙之法所得如是以斯之故若茲等倫處於正路其聞斯典即信樂者講說平等章句歎頌廣爲他人分別演者德悉如是何況奉行修如所教濡首與諸菩薩大士大迦葉王阿闍世及無數人往詣佛所稽首禮足却坐一面爾時舍利弗見濡首與諸會者悉坐定已謂王阿闍世大王狐疑寧

爲斷乎答曰唯然仁者尋則斷矣又問云何
斷答曰不受不捨是謂爲斷亦無所得本末
永了無有垢染則爲斷矣舍利弗白世尊曰
王阿闍世所畢幾如餘有幾如世尊告曰王
之餘殃猶如芥子所滅之罪如須彌山入於
深法所說經義至無生法舍利弗又白佛言
王阿闍世當復往歸於惡趣乎答曰如忉利
天子在於七寶重閣交露下閻浮尋還本處
如是舍利弗王阿闍世所入地獄名賓陀羅
此言欲適入尋出其身不遭苦惱之患舍利弗

言難及世尊王阿闍世諸根明達乃如斯乎
又能蠲除若干罪豐如斯重殃地獄之毒佛
告舍利弗王阿闍世前已供養七十二億諸
佛世尊植衆德本啓受經典所聞法者勸無
上正真之道汝豈見湍首童真乎對曰已見
毀四世尊告曰湍首童真勸阿闍世使發無上正
真道意於難計劫離垢藏如來無數諸佛於
彼劫中而有三億平等正覺悉是湍首所可
誘勸使轉法輪長壽久存設百千世尊終不
能爲王阿闍世說法決疑其惟湍首能爲斯

王決於疑網所以者何滯首童真數從諸佛聞是深法以是故當作斯觀其有菩薩應所度者本從發意得其本師爲之說法乃能解耳王阿闍世從集欲輕地獄出生於上方去是五百佛國其世界曰莊嚴其佛號寶英如來至真等正覺今現說法當復重見滯首從聞深經在於彼土即當逮得起法忍彌勒菩薩成正覺時當復來下還斯忍界號曰不動菩薩大士彌勒如來當爲衆會宣讚不動菩薩前所興爲又復分別於此經典敷陳至

義不動大士能仁佛世作大國王名阿闍世從惡友言自害其父從滯首聞所說經要得柔順法忍因此除罪令無有餘彌勒如來緣不動菩薩說此經法八千菩薩得起法忍八萬四千菩薩蠲除無數不可計會罪豐積聚如是舍利弗王阿闍世從今已往八百難計會劫修菩薩行開化衆生嚴淨佛土又舍利弗王阿闍世所化衆生爲聲聞地若緣覺地若行大乘斯等衆生當有罪蓋無塵垢蔽狐疑悉除無有猶豫過於八千不可計劫當

數四

七

得無上正真之道爲最正覺劫名喜見世界
曰無造陰佛號淨界如來至真等正覺壽十
四劫諸聲聞衆十七萬人而爲大會一切慧
解志八脫門諸菩薩衆有十二億皆得智度
無極善權方便滅度之後正法當住一億歲
無造陰世界所有黎庶至於壽盡無狐疑者
終歿之後不歸三塗淨界如來設爲羣生講
說經者悉去諸垢無有塵勞皆得清淨是故
舍利弗人人相見莫相平相所以不當相平
相者人根難見獨有如來能平相人行如佛

者可平相人也賢者舍利弗及大衆會驚喜
踊躍而說斯言從今日始盡其形壽不觀他
人不敢說人某趣地獄某當滅度所以者何
羣生之行不可思議時佛說此喻阿闍世決
三萬二千天子發無上正真道意各誓願曰
淨界世尊成正覺時吾等當生於彼佛土不
造欲世界佛即記之當生彼土
月首受決品第十二
王阿闍世有一太子名曰月首厥年八歲解
頸瓔珞用散佛上而曰吾以此德勸助無上

正真之道以斯善本淨界如來成正覺時願
於彼土為四域主轉輪聖王盡其形壽供養
如來及比丘眾佛滅度後奉持舍利而受經
典然後得成無上正真之道為最正覺適散
珠璣便於虛空則成七寶交露棚閣四方四
植上下平等嚴正雅妙於其閣內安四寶牀
敷天繒綵如來坐之相好莊嚴佛時即笑世
尊笑法則有無數不可貨限百千光色從其
口出照難思議無有邊際諸佛世界超於梵
天魔之宮殿日月光明自然蔽暄焰迴繞身

無央數帀從頂上入賢者阿難即從座起偏袒右肩長跪叉手以偈讚曰	度一切諸慧	超越眾星礙	解了羣生類
心行之根源	以分別本末	應時而說法	眾生在十方
普照世願說	何因而欣笑	無數億姦眾	一一而難問
一切處其前	能仁之聖師	乃堪決其疑	善哉願解說
愍哀何故欣	又當來世尊	猶如江河沙	分別知六趣
慧度於無極	所以現欣笑	離垢願解疑	

光明超日月

翳魔釋梵宮

通徹諸鐵圍

越照衆山頂

安隱烝黎元

枯竭衆勤勞

善說除諸垢

何故熙欣笑

於是世尊告阿難曰寧見月首太子乎對曰

唯然已見佛言今此月首而於佛前植衆德

毀四

九

本則以勸助無上正真道稍當漸漬修菩薩
行淨界如來成佛道時又此太子生彼佛土
爲轉輪王供養奉事淨界如來至真等正覺
盡其形壽施以所安滅度之後供養舍利執
御正法法滅盡後即當遷沒生兜率天則於

其劫得爲無上正真道成最正覺號月英如
來至真等正覺明行成爲善逝世間解無上
士道法御天人師爲佛衆祐國土所有佛之
壽命諸比丘衆亦如淨界世尊等無差特也
爾時他方世界諸來會者菩薩大士與濡首
俱至此忍界聞說斯言前啓白佛濡首童真
所可遊至則當觀之其土處所悉爲如來無
有空缺諸佛世尊不復勞慮所以者何唯然
世尊濡首所攝終無惡趣不閑及諸魔
事罪蓋塵穢其有州域郡國縣邑丘聚城郭

於斯正典而流布者則觀其處如來遊居無有虛空世尊告曰如是如是族姓子誠如所云今斯經典所宣布處則是如來之所遊止則是如來慇懃垂教又族姓子乃昔往古錠光佛時吾於彼世而受得決所敷髮地錠光如來蹈越髮上散以蓮華逮得法忍授吾剎曰後無數劫當得作佛號能仁如來如是族姓子時錠光佛告諸比丘汝等不當越蹈斯地所以者何是者則爲天上世間神寺佛塔菩薩敷髮其處所者而逮法忍誰欲於此而

起塔者彼諸天子八十億人同時稱曰吾等當起爾時會中有一長者名曰賢天白世尊曰吾於斯地當起塔寺佛言可與族姓子賢天長者即於彼處起七寶塔莊嚴具足還詣錠光而問佛言予在其地興七寶塔福何所趣錠光如來尋報之曰長者欲知菩薩大士得不起忍計其地處若如車輪下盡地際一切衆生各取土塵皆如舍利而供養之乃復上至三十三天滿中七寶以布施佛若欲比之起塔寺福終不相及塔寺之福最多難計

毀四

十

長者於此所植德本如我今授摩訶之剎當
爲無上正真之道若成佛者亦當立卿於大
道決於族姓子意念云何爾時長者名賢天
者豈異人乎莫作斯觀所以者何此衆會中
有長者子名曰受行今吾授決當於來世而
得佛道號善見如來至真等正覺明行成爲
善逝世間解無上士道法御天人師爲佛衆
祐以是之故族姓子族姓女比丘比丘尼清
信士清信女若住若坐書是經典持誦誦讀
爲他人說則於其處下盡地際一切諸塵悉

爲衆生又此土者悉如舍利所以者何得忍
菩薩成就衆德亦復如是故佛告汝慙慙囑
累若族姓子族姓女於是三千大千世界滿
中七寶布施如來至真等正覺晝夜各三而
不懈怠布施隨時至於一劫若復過劫不如
受是經典王阿闍世除諸狐疑無有猶豫淨
諸陰蓋分別一切諸法平等若書若讀受持
諷誦聞之信樂書著竹帛匹素經卷衿莊執
翫令此正法而得久住此功德福過彼甚多
不可稱限佛言族姓子若於百劫奉持禁戒

毀四

十一

普知止足乃得閑居忘樂不捨其聞是經而信樂者其功德福則過於彼守禁戒上若於百劫如行忍辱一切衆生罵詈撻捶加以杖痛而皆忍之若復有人聞此經要而信樂者其功德福則便超越彼忍辱上若於百劫而行精進供養一切衆生之類而不愛身及其壽命不如聞是經歡喜信者若於百劫而行禪思有觸燒者而不惑亂不如聞是經歡喜信者若於百劫而行智慧博覽曉了無所不達設復聞此究竟本淨心暢自然經典之品

而歡喜信受持諷誦其功德福則超越彼能速勸立諸通慧矣時諸菩薩俱白佛言唯然世尊吾等已受於斯經典在在所遊諸佛國者有所住處便當宣布所以者何衆經典者則興佛事時諸菩薩舉聲歎曰便復散華徧於三千大千世界而說斯言設此經典布閭浮提而住長久世尊能仁正法顯成濡首童真當使永存所以吾等未曾省聞如是像經假使聞者吾等不能加報佛恩及與濡首當以何等興大供養若族姓子從人聞斯經典

者其恩難報假使有人欲見如來從聞是經
當觀其人如見世尊設欲供養如來至真等
正覺者便當供養此族姓子若覩族姓子族
姓女當瞻仰之如佛世尊諸菩薩等咨嗟已
畢稽首佛足右遶三匝於此佛土忽然不現
各各遷還其本國土各各自住其如來前如
所受法廣為人說則於佛前一彼土開導
教化無數羣生使發無上正真道意

囑累品第十三

爾時世尊告彌勒曰仁當受斯正法明典爲

無數人而分別說多所安隱多所哀念諸天
世人悉當蒙恩彌勒菩薩而白佛言唯然世
尊吾則受斯經典教已亦從過去等正覺所
啓受是經於今現在面值世尊得聞斯法唯
然大聖如來現在吾以此經演令流普佛滅
度後在兜率天當爲羣生分別說此植衆德
本若族姓子族姓女然於後世耳聞斯經志
大乘者當知彌勒之所建立奉持斯經若有
弊魔伺求其便吾等當承世尊聖旨而將護
之使無瑕短佛告帝釋當受斯經阿闍世品

斷一切結所以者何天阿須倫假使懷恨而
戰鬪者當念斯經諸天則勝阿須倫降佛言
拘翼今囑累汝若斯經典在於州域郡國縣
邑城郭丘聚則護其土怨敵讎讎不得其便
若至縣官若在賊中若逢禽獸若值鬼神若
遇盜賊若遭水火恐懼之難便當思念於斯
經典而說歌頌若有怨家寇賊惡逆不得其
便爾時佛告賢者阿難受斯經典持諷誦讀
所以者何假使有人從汝求此經典要者其
族姓子若族姓女斷一切疑無有猶豫洗除

毀四

十三

衆結末已除了諸魔罪蓋不能覆蔽宿之殃
豐邪害星礙自然消滅所以者何設聞斯經
則無狐疑佛告阿難吾囑累汝慇懃誠勅若
犯逆者入斯典要歡喜忻悅則無有逆亦無
危害而無罪蓋者年迦葉白世尊曰唯然大
聖吾見證明於斯經典向者就王阿闍世宮
分別逆事王阿闍世尋時逮得起法忍疑
網即除我時念言王阿闍世本不曉了一切
諸法亦不分別諸逆之事唯然世尊諸法本
淨自然之性而反思想計有吾我而立諸見

不能理練一切諸逆之本淨也如阿闍世習
近顛倒虛偽衆相成勤苦患若究暢此則無
衆難吾從今始說諸羣生亦無有罪無惡趣
法其入此者則超絕去無有終始佛言善哉
善哉迦葉誠如所云諸佛世尊道義之正無
有塵垢賢者阿難前白佛言唯然世尊建立
斯典令後末世遊閻浮提爾時世尊從左右
脅放大光明普照三千大千世界樹木牆壁
普自然出如茲音響如來則建斯經典已設
此經典在大海中若劫燒時應聞是經不得

中斷而不聞也佛告阿難悉如樹木牆壁所
出音聲誠如所云斯諸正士植衆德本最後
世時受是經者終不中天佛說是經時九萬
六千天人遠塵離垢得法眼淨六萬八千天
人悉發無上正真道意二萬二千菩薩得不
起法忍八千人離諸貪欲此三千大千世界
六返震動應時大音普告天上世間悉來供
養於斯經典諸天妓樂不鼓自鳴普告天上
世間悉來散華燒香雜香擣香澤香面悉值
斯所轉法輪如來於此所說經者悉為降伏

數四

十四

衆邪異道却諸邪見行抑制衆魔斯如來印
則爲精修如來之法諸族姓子便當分別求
此法印究竟正見佛說如是王阿闍世濡首
童真彌勒大士一切菩薩諸大聲聞舍利弗
大迦葉須菩提阿難等諸天世人阿須倫闍
佛所說莫不歡喜

晉超三昧經卷第四

佛說放鉢經

即普超經第三品別譯

安公錄失譯人名開元附西晉錄

佛在舍衛祇洹精舍時與諸菩薩無央數比
立比丘尼優婆塞優婆夷諸天王釋梵及阿
須倫鬼神龍諸人非人無央數悉會坐佛說
菩薩法無央劫勤苦泥犁禽獸薜荔一切憂
勞十方布施金銀珍寶車馬奴婢及妻子頭
目肌肉皆不愛惜用施十方人勤苦故時忉
利天上二百天子前世作菩薩道未堅在佛
所聞求道勤苦皆念道劇難得心便轉求羅

卷四

十五